



Deddf Partneriaeth Gymdeithasol a Chaffael Cyhoeddus (Cymru) 2023

2023 dsc 1

RHAN 3

CAFFAEL CYHOEDDUS CYMDEITHASOL GYFRIFOL

PENNOD 4

CYFFREDINOL

43 Canllawiau

- (1) Caiff Gweinidogion Cymru ddyroddi canllawiau ar weithrediad y Rhan hon.
- (2) Caiff canllawiau, yn benodol, wneud darpariaeth ynghylch—
 - (a) bodloni'r gofyniad yn adran 24(1) i gynnal caffael cyhoeddus mewn ffordd gymdeithasol gyfrifol;
 - (b) gosod amcanion caffael cymdeithasol gyfrifol;
 - (c) cymryd pob cam rhesymol i fodloni amcanion caffael cymdeithasol gyfrifol;
 - (d) cymalau gweithiau cyhoeddus cymdeithasol;
 - (e) y cod allanoli gwasanaethau cyhoeddus a'r gweithlu;
 - (f) cymalau gweithlu cyhoeddus cymdeithasol;
 - (g) ymgynghori wrth lunio strategaeth gaffael;
 - (h) ffurf a chynnwys strategaethau caffael ac adroddiadau caffael blynyddol;
 - (i) y broses a ddefnyddir gan awdurdod contractio i gymeradwyo ei strategaeth gaffael;
 - (j) strategaethau caffael ar y cyd.
- (3) Rhaid i awdurdod contractio roi sylw i ganllawiau perthnasol a gyhoeddir gan Weinidogion Cymru.

- (4) Cyn dyroddi canllawiau o dan y Rhan hon, rhaid i Weinidogion Cymru ymgynghori â'r canlynol—
- (a) yr CPG;
 - (b) unrhyw bersonau eraill y maent yn ystyried eu bod yn briodol.

44 Rheoliadau

- (1) Mae pŵer i wneud rheoliadau o dan y Rhan hon—
- (a) yn arferadwy drwy offeryn statudol;
 - (b) yn cynnwys y pŵer i wneud darpariaeth wahanol at ddibenion gwahanol;
 - (c) yn cynnwys y pŵer i wneud darpariaeth ddeilliadol, darpariaeth atodol, darpariaeth ganlyniadol, darpariaeth drosiannol, darpariaeth ddarfodol neu ddarpariaeth arbed.
- (2) Ni chaniateir gwneud offeryn statudol sy'n cynnwys rheoliadau a wnaed o dan adran 22(4), 24(8)(c), 25(3) neu 27(4) oni bai bod drafft o'r offeryn wedi ei osod gerbron y Senedd ac wedi ei gymeradwyo ganddi drwy benderfyniad.
- (3) Mae unrhyw offeryn statudol arall sy'n cynnwys rheoliadau a wnaed o dan y Rhan hon yn ddarostyngedig i'w ddi-ddymu yn unol â phenderfyniad gan y Senedd.

45 Dehongli Rhan 3

- (1) Yn y Rhan hon—
- mae i “awdurdod contractio” (“*contracting authority*”) yr ystyr a roddir yn adran 22;
- mae i “caffael cyhoeddus” (“*public procurement*”) yr ystyr a roddir yn adran 23;
- mae i “y cod allanoli gwasanaethau cyhoeddus a'r gweithlu” (“*the public services outsourcing and workforce code*”) yr ystyr a roddir yn adran 32(1);
- mae i “contract allanoli gwasanaethau” (“*outsourcing services contract*”) yr ystyr a roddir yn adran 26(2);
- mae i “contract consesiwn gweithiau” yr ystyr a roddir i “works concession contract” gan reoliadau 2(1) a 3(2) o'r Rheoliadau Contractau Consesiwn;
- mae i “contract gweithiau” yr ystyr a roddir i “works contracts” gan reoliad 2(1) o'r Rheoliadau Contractau Cyfleustodau;
- mae i “contract gweithiau cyhoeddus” (“*public works contract*”) yr ystyr a roddir gan reoliad 2(1) o'r Rheoliadau Contractau Cyhoeddus;
- mae i “contract rhagnodedig” (“*prescribed contract*”) yr ystyr a roddir yn adran 24(8);
- mae i “cymalau gweithiau cyhoeddus cymdeithasol” (“*social public works clauses*”) yr ystyr a roddir yn adran 27;
- mae i “cymalau gweithlu cyhoeddus cymdeithasol” (“*social public workforce clauses*”) yr ystyr a roddir yn adran 33;
- ystyr “cytundeb fframwaith” (“*framework agreement*”) yw cytundeb rhwng un neu ragor o awdurdodau contractio ac un neu ragor o weithredwyr economaidd, gyda'r diben o sefydlu'r prif delerau sy'n llywodraethu contractau cyhoeddus (contractau yn ôl y gofyn) sydd i'w dyfarnu yn ystod cyfnod penodol, yn enwedig o ran prisio'r pethau y rhagwelir y cânt eu caffael a, lle y bo'n briodol, eu nifer;

mae i “gweithiau” yr ystyr a roddir i “works” gan baragraff 2 o reoliad 2(1) o’r Rheoliadau Contractau Cyhoeddus;

ystyr “gweithredwr economaidd” (“*economic operator*”) yw unrhyw berson sy’n cynnig cyflawni gweithiau, cyflenwi cynhyrchion neu ddarparu gwasanaethau ar y farchnad;

ystyr “y Rheoliadau Contractau Consesiwn” (“*the Concession Contracts Regulations*”) yw [Rheoliadau Contractau Consesiwn 2016 \(O.S. 2016/273\)](#);

ystyr “y Rheoliadau Contractau Cyfleustodau” (“*the Utilities Contracts Regulations*”) yw [Rheoliadau Contractau Cyfleustodau 2016 \(O.S. 2016/274\)](#);

ystyr “y Rheoliadau Contractau Cyhoeddus” (“*the Public Contracts Regulations*”) yw [Rheoliadau Contractau Cyhoeddus 2015 \(O.S. 2015/102\)](#);

mae i “sefydliadau gwirfoddol” yr ystyr a roddir i “relevant voluntary organisations” o fewn ystyr adran 74(2) o [Ddeddf Llywodraeth Cymru 2006 \(p. 32\)](#).

- (2) At ddibenion y Rhan hon mae gwerth amcangyfrifedig contract i’w ganfod yn unol â rheoliad 6(1) o’r Rheoliadau Contractau Cyhoeddus.